

Lippijn

editie P. Leendertz jr.

bron

‘Lippijn’ In: Instituut voor Nederlandse Lexicologie (samenstelling en redactie), *Cd-rom Middelnederlands*. Sdu Uitgevers/Standaard Uitgeverij, Den Haag/Antwerpen 1998.

Zie voor verantwoording: http://www.dbnl.org/tekst/_lip001lipp01_01/colofon.htm

© 2001 DBNL



Lippijn
Hier beghint die sotternie.

Hier beghint dwijf.

Hem! segt, hem! god hebs al deel!
 Ic wil gaen driven mijn riveel
 Met minen suete lieve int gras.
 Hets lanc leden dat ic met hem niet en was.
 5 Hem! segt, hem! waer sisi, Lippijn?

Lippijn.

Ic ben hier, wat saelt sijn?

Sijn wijf.

Lippijn, ghi moet gaen halen borre ende vier,
 Ende ic sal wedercomen scier
 Ende bringhen ons iet, dat wi selen eten.

Lippijn.

10 Bi der doot ons heren, ghi selet vergeten,
 Ghi pleeght soe dicwile lange te merren.

Sijn wijf.

Wat, Lippijn, ghi en moghet u niet erren,
 Want ic hebbe dicwile vele te doene:
 Eer ic ghehoere mine sermoene,
 15 Soe vallet hoghe op den dach,
 Ende eer ic ten vleeschuus comen mach,
 (Soe copic oec gherne goeden coep)
 Dan so moetic beiden tot den loep

Es ghedaen vanden bedranghe;
 20 Alsoe comet toe, dat ic merre soe lange,
 Goede Lippijn, ghi moetet al weten.

Lippijn.

Awarijt, ghi souwes mi vele ontmeten,
 Ende ic en weter wat toe segghen.
 Gaet henen, ic sal ons vier anleggen
 25 Ende halen borre ende scueren den pot,
 Want alsoe moet mi hulpen god,
 Ic hebbe mi oeit te slaverniën geset.

Sijn wijf.

Goede Lippijn, wast die scotelen met
 Ende kerijt ons den vloer scoene.

Lippijn.

30 Goeder, nu hoert, dat u god loene!
 Ende mer daer bi niet. Al hebbic al mijn dage
 Gheweest uwe aerme slave,
 Mi dunct ic moetse noch sijn al mijn leven.

Sijn wijf.

Swijt, god moet u lachter geven;
 35 Dat ghi soe langhe leeft, dats mi leet.
 En es dit niet een scoen besceet?
 Waer mach hi merren, mijns herten druut?
 Het geet hem al te galgen uut,
 Dat hi mi al dus te vondeling set.

Haer lief.

40 Minnekijn, hets messelijc wat mi let.
 Hebdi hier gheweest herde lange?

Lippijns wijf.

Jaic, mijn herte es soe wranghe,
 Dat ic u soe langen niet en sach.

Haer lief.

45 Laet ons gaen drinken een goet gelach,
 Mijn uutvercoren minnekijn,
 Wi selen noch tavont met vrouden sijn
 Lichteleec. Nu comt hier naer!

Lippijn.

O wi, here, es dat waer?
 Bi gode, ic hebs genoeg gesien,
 50 Want si leet metten bloeten knien
 Ende hi esser tusschen gecropen;
 Bider doot ons heren, hi esser in geslopen.
 Siet met deser hoeren, ende geeft mi te verstane,
 Dat si te messen pleght te gane,
 55 En leet en droeylt met enen anderen man
 Ende maect van mi enen pol, her Jan.
 Si seet, si gheet in tvleschuus;
 Bi sente Jan, ic sal haer dit abuus
 Noch tavont tongoede maken.
 60 Canic an enen stoc gheraken,
 Ic sal haer touwen soe haer vel,
 Dat haer rouwen sal dit spel,
 Dat si met hem heeft bedreven.

De comere.

Wat, Lippijn! god moet u goeden dach geven.
 65 Hoe steet met u? hoe sidi te gemake?

Lippijn.

Ey, Trise! ic woude mi therte brake
 Van groten rouwe die ic drive.
 Ic en hadt nemmermeer minen wive
 Betrout, dat si mi heeft gedaen.

De comere.

70 Lippijn, nu doet mi verstaen,
 Hoe ende oec in wat manieren?

Lippijn.

Dies ic mi eweleec moet scofieren:
 Si leget en droeylt met enen anderen man.

De comere.

75 Awarijt, dats een dinc dat ic niet en can
 Gheloeven van uwen wive;
 Ic kinse alsoe reine van live,
 Si en daets om al die werelt niet.

Lippijn.

Dat een man met sinen ogen siet,
 Dats hem nochtan quaet tongheven.

De comere.

80 Lippijn, alsoe moetic met eren leven,
 Bi sien es die meneghe bedroghen.

Lippijn.

85 Wat? neen, dit en es niet gheloghen,
 Want ic hebse selve ghesien
 Ligghen metten bloeten knien,
 Ende gingen hem beide te werke stellen.

De comere.

90 Wat, Lippijn, dat en soudi niet vertellen;
 U wijf waer daer bi gheonneert.
 U ogen sijn al verkeert
 Van drincken ende van ouden dagen.
 Goede Lippijn, en wilt des niet gewagen;
 U wijf waer daer bi ghescent.

Lippijn.

95 Wat duvel, seldi mi maken blent
 Van dingen, die ic selve sach?
 Ic sach dat si averecht lach,
 Ende hi raepster op haer slippen.

De comere.

Ey swijt, goede Lippen,
 En was anders niet dan u dochte.
 En hoerde ghi noit seggen van alfsgedrochte,

- Dat die liede pleghet te bedrieghen?
 100 De viant geeft luttel om een liegen
 Om toren te maken tusschen man ende wijf.
 Ic wilder over setten mijn lijf,
 En waest niet een elvinne dat ghi saecht.

Lippijn.

- Wat duvel, heeft god die werelt geplaecht
 105 Met alven ende met elvinnen?
 En soudic dan mijn wijf niet kinnen?
 Dat ware emmer een messeleec dinc.
 Ic sach dat si met hem ginc,
 Hi namse in sinen aerm ende tracse naer.

De comere.

- 110 Lippijn, loghen en was noit waer;
 Daer toe kinnic te wel u wijf,
 Want si heeft alsoe reine lijf,
 Si en daets om al de werelt niet van goude roet.
 Maer dalfsghedrochte es alsoe groet,
 115 Dat den menegen maect soe blint,
 Dat hi hem selven niet en kint;
 Hoe soude hi dan enen anderen gekinnen?

Lippijn.

- Bider doot ons heren, ghi maect mi al uutten zinnen.
 Wat duvel, es mi nu ghesbiet?
 120 Benic blint ende en sie ic niet?
 Des wonders ghelijc en sagic nie,
 Ende ic sie wel alle dese lie,
 Die hier sitten al omtrent;
 Entrouwen, soe en benic al niet blint,
 125 Al soudijs mi gherne maken vroet.

De comere.

- Lippijn, wetti wat ghi doet?
 Ic biddu dat ghijs nemmeer en segt
 Ende ghi u wijf met eren dect.
 Het es ene elvinne die u quelt,
 130 Si heeft u ghesichte al onstelt,
 U ogen staen al ontset.

Lippijn.

Ey goede, eest dat, dat mi let?
Mi dochte emmer, dat icse sach.

De comere.

Het was ene elvinne dat daer lach,
135 Dat willic u sweren op een cruus.
U wijf sit noch in haer huus,
Dat willic wedden om een bier.

Lippijn.

Ende si hiet mi gaen halen borre ende vier,
Si seide, si soude gaen om eten.

De comere.

140 Wat, Lippijn, wildi die waerheit weten,
Soe sidi seker te male verleidt;
Ene elvinne heeft haer nette gespreidt,
Dat sie ic wel, om u te vaen.
Comt met mi, wi selen voer u dore gaen:
145 U wijf sit noch bi haren viere.

Lippijn.

Wat! benic dronken vanden biere,
Ochte vlieghen dalve achter straten?

De comere.

Wat, ghevadere! en moghdi ons niet in laten?

Lippijns wijf.

Wet key, jaic, wie es daer?

De comere.

150 Wat, Lippijn, en seidic u niet waer?

Lippijn.

Benedijste god van hemelrijc,

Soe en saghic noit des wonders gelijc.
Ic sie wel, die scouwen die sijn mijn.

De comere.

Wat seidic u, lieve Lippijn?

- 155 Maer ghi en woudes niet wesen vroet.
Mijn gevadere es getrouwe ende goet,
Al soudier gerne een hoere af maken.

Lippijns wijf.

God gheve hem ramp in sine kaken!
Heeft hi hem van mi dies beclaecht?

De comere.

- 160 Jay, ende dat ghi bi enen anderen man laecht,
Dies heeft hi mi ghedaen een beclach.

Lippijn.

Awarijt, mi dochte dat ict sach,
Maer ic laets mi nu ghenoeghen;
Trise caent wel int beste voegen.

- 165 Maer al hadt mi mijn lijf gedaen,
Soe waerdi heden morgen opgestaen
Ende hiet mi halen vier ende borre.

Lippijns wijf.

Swijt, wel vule corre,
Beghindi mi anderen man ane te tiën?

Lippijn.

- 170 Seker, woudic die waerheit liën,
So saghic, of mijn ogen waren mi verkeert.
Maer Trise heeft mi alsoe geleert
Ende seet, dat mi een alf heeft bedroghen.

Lippijns wijf.

- 175 Waer omme hebdi mi dan beloghen
Ende doet mi scande over al?

Lippijn.

Ey minnekijn, ic ben diet beteren sal,
Hebbic iet messeit ofte mesdaen.

Lippijns wijf.

Ghi selter nochtan smeten omme ontfaen,
Vul, out, quaet grijsaert!

De comere.

180 Bi onsen here, hi waers wel waert,
Dat wine onder voete gingen leggen.

Lippijn.

Lieve wijf, ic en saels nemmeer seggen;
Ic en wiste niet, dat ic was in dolen.

Lippijns wijf.

Ey, men sal u leren gaen ter scolen.

Hier vechtensi.

Nota .c.lxxxij. vs;.

185 Ghi goede liede, dit hebben wi
Ghespelt al in een boerement.
Si leven noch wel, si u bekent,
Die dese gheliken wel hebben gesien.
Wet dat menech boerden gescien,
190 Daer dusdaneghe mere niet af en gaet.
Daer bi biddic u, dat ghi ontfaet
In dancke ons fobitasie.
Ic bidde den coninc vol van gratie,
Die vander maghet was gheboren,
195 Dat hem niement en wille storen
Van dat hi hier heeft gesien ende gehoert.
Staet op, ghi moget wel gaen voert,
Want wi moeten alle scheiden:
Ons here god moet ons allen geleiden.

Amen.